

26. april 2012

Inatsisartut suleriaasiat § 37 imm. 1. naapertorlugu Naalakkersuisunut apeqqut.

1. Nunatsinni Ilisimatusarfimmi palasinngorniartarnerup tassalu teologimik ilisimatusartarnerup nunatsinni ingerlanneqartarunnaarnissaa sumit tunngaveqarpa?
2. Palasinngorniartarnermik ilinniagaqartarnerup qallunaat nunaannut Danmarkimut nuunneqarnissaa Naalakkersuisunit pilersaaruteqarfigineqarnera sumit aallaveqartinneqarpa?
3. Teologimik ilisimatusartoqartalenera nunatsinni 1997-mi aallartinneqartoq soqutigineqarpoq, nunattami Ilisimatusarfiani taamanikkornit 7-it palasinngorsimapput, ataaserlu kisimi qallunaat nunaanni 1997 sioqqullugu taamaallaat ilinniagaqarsimavoq. Taamaasilluni ersarippoq nunatsinni ilinniarnissap kajungerineqarnera, annertunerusoq. Taamaattumik paaserusunnarsivoq palasinngorniartarnerup nunatsinniiginnarnissaanik Naalakkersuisut isummaminnik allannguinnissaat bach. teologinit kissaatigineqartoq Naalakkersuisut qanoq isumaqarfigineraat?
4. Inatsisartut aammalu ilagiit uani apeqqummi akuutinneqannginnerat imaluunniit isumasiorneqannginnerat sumit tunngaveqarpa?
5. Naalakkersuisut nunatsinni kalaallisut oqalussinnaasunik palasissaaleqinerujussuaq qanoq iliuuseqarfiginiarpaat.

(Inatsisartuni ilaasortaq Ruth Heilmann, Siumut)

### **Tunngavilersuut:**

Ippassaq 23. april 2012 bach. teologit inatsisartunut saaffiginnissuteqarput Ilinniartitaanermut Naalakkersuisumut Palle Christiansenimut allakkat assingannik, qulaani apeqquteqarninnut allakkat taakku tunngaviupput. Taakkuami tassalu Teologisk Forumip tusarniaaffigineqarnermini palasinngorniartarnerup qallunaat nunaannut nuunneqarnissaanik akerliunerminnik allagaqaataa aamma apeqquteqarninnut tunngaviuvoq.

Minnerunngitsumillu nunatsinni pissutsit aallaavigalugit ilageeqarnerlu aallaavigalugu, nunatsinni aamma namminerisamik kultureqarfiusoq najorlugu, naleqqulluinnarmat palasinngorniartarnerup nunatsinniiginnarnissaa, taamaangippat kingumut aallarnerussaaq uffa Namminersorneq nunatsinnut eqqunneqareersoq.